

Buddsoddi £8miliwn a rhagor yn ysgolion Dinbych-y-pysgod



Mae'r penaethiaid addysg yn Neuadd y Sir ar ben eu digon ar ôl i sêl bendith gael ei rhoi ar y cynlluniau sydd gyda hwy i fuddsoddi £8.37 miliwn yn ysgolion cynradd Dinbych-y-pysgod.

O ganlyniad i gynigion cyffrous Cyngor Sir Penfro bydd dwy o ysgolion newydd yn cael eu hadeiladu:

- Ysgol Gynradd newydd Wirfoddol a Reolir cyfrwng Saesneg i blant 3-11 oed, mewn adeilad newydd sbon, a gaiff ei hadeiladu wrth ochr yr ysgol gynradd bresennol
- Ysgol Gynradd Gymunedol newydd cyfrwng Cymraeg i blant 3-11 oed, ar safle'r ysgol gynradd bresennol

Cyfanswm y gost fydd £8.37 miliwn, a'r Cyngor Sir a rhaglen Ysgolion ar gyfer yr 21ain Ganrif sy'n cael ei chynnal gan Lywodraeth Cymru, fydd yn cydrannu'r gost hon.

"Dyma newyddion bendigedig i Ddinbych-y-pysgod," meddai'r Cynghorydd Ken Rowlands, yr Aelod Cabinet dros Blant ac Ysgolion.

"Bydd y ddwy ysgol newydd hyn yn rhoi'r cychwyn addysgol gorau posibl mewn bywyd i blant yn yr ardal.

"Mae hefyd yn dangos yn bendant bod y Cyngor Sir am ddal ati i fuddsoddi yn addysg a dyfodol ein pobl ifanc."

Fe roddwyd sêl bendith ar y cynigion gan Huw Lewis, y Gweinidog Addysg a Sgiliau, ac meddai:

"Bydd sefydlu'r ysgolion newydd hyn yn hybu darpariaeth addysg o safon uchel, gyda chyfleusterau a adeiladwyd yn bwrpasol i fodloni ysgolion ar gyfer yr 21ain ganrif."

Fe gafwyd y sêl bendith hon yn sgil ymgynghoriad a gynhaliwyd gan y Cyngor Sir gyda rhieni, staff a llywodraethwyr Ysgol Fabanod WR Dinbych-y-pysgod ac Ysgol Gynradd Gymunedol Dinbych-y-pysgod yn 2012, a hefyd yn sgil cyhoeddi Hysbysiad Statudol yn 2013.

Dywedodd Llywodraeth Cymru hefyd bod y Gweinidog wedi argyhoeddi ei hun bod yr awdurdod lleol wedi ymdrin, yn foddhaol, â'r pum gwrthwynebiad.

Ni fydd dalgylchoedd yr ysgolion cynradd newydd yn newid o gwbl ac felly byddant yn union yr un fath â'r ardaloedd y mae'r ysgolion presennol yn eu rhannu ar hyn o bryd.

Fe gyflwynir cais am ganiatâd cynllunio am yr adeilad newydd ar gyfer yr ysgol cyfrwng Saesneg, a fydd â lleoedd dysgu ar gyfer 318 o ddisgyblion.

Bydd gan yr ysgol gymeriad crefyddol dynodedig a bydd hefyd yn cynnal swyddogaeth yr eglwys ym maes darparu addysg gynradd yn Ninbych-y-pysgod.

O ran yr ystafelloedd bydd gyda hi uned â dwy ystafell ddosbarth ar gyfer plant ag Anghenion Addysgol Arbennig, ystafell ddosbarth meithrin â 30 lle a 15 o leoedd mewn ystafell ddosbarth oedran cymysg - meithrin/derbyn. Ac ar ben hynny fe fydd darpariaeth hefyd i gylch chwarae'r blynyddoedd cynnar.

Bydd gan yr ysgol cyfrwng Cymraeg ddigon o leoedd i 210 o ddisgyblion, yn ogystal ag ystafell ddosbarth meithrin â 30 lle, tawelfan a chyfleusterau chwarae yn yr awyr agored.

Fe wnaethpwyd gwaith adnewyddu ar raddfa fawr yn 2006 ac o ganlyniad i hynny mae gan bob un o'r ystafelloedd fynediad uniongyrchol at yr awyr agored. Bydd yn rhaid ail-lunio rhywfaint ar yr adeilad er mwyn iddo allu derbyn disgyblion y Cyfnod Sylfaen.

Penderfynwyd adeiladu ysgol cyfrwng Cymraeg yn sgil y duedd sy'n cynyddu o hyd, i gael addysg cyfrwng Cymraeg yn ardal Dinbych-y-pysgod a'r hanes cadarn sy'n dangos bod y disgyblion, wedi hynny, yn mynd i Ysgol Uwchradd Cyfrwng Cymraeg.

Mae gan Ysgol Fabanod WR Dinbych-y-pysgod ac Ysgol Gynradd Dinbych-y-pysgod glwb brecwast bob dydd a nifer o glybiau amser cinio ac ar ôl oriau ysgol. Y bwriad yw y bydd hyn yn parhau yn yr ysgolion newydd ac fe ragwelir y gellid, o bosibl, datblygu rhagor ar 'y gofal cofleidiol' yn ardal Dinbych-y-pysgod.

Disgwylir y bydd y cynigion hyn yn cael eu rhoi ar waith, mewn grym o 31 Awst 2016 ymlaen.

O'r dyddiad hwnnw ymlaen, bydd y disgyblion sy'n mynychu Ysgol Fabanod WR Dinbych-y-pysgod neu Ysgol Gynradd Dinbych-y-pysgod - cyhyd â bod eu rheini'n dweud taw hynny yw eu dewis - yn cael eu trosglwyddo i'r naill neu'r llall o'r ysgolion newydd.

Mae'n rhaid i'r Cyngor Sir gael caniatâd cynllunio, erbyn 31 Rhagfyr 2014, ar gyfer yr adeiladau ysgol newydd neu'r adeiladau ysgol a ail-lunnir, ac mae'r cynigion yn amodol ar hynny.

Geiriad

Yn y llun gwelir y Cynghorydd Ken Rowlands (ar y chwith) yn Ysgol Gynradd Dinbych-y-pysgod yn ystod yr hydref. Gydag ef mae Jake Morgan, y Cyfarwyddwr Plant ac Ysgolion (ar y dde) a Keith Towler, Comisiynydd Plant Cymru.